

## DOMENIE XXII «VIE PAL AN»

### Antifone di jentrade cf. Sal 85,3.5

**V**e dûl di me, Signôr,  
ch'o ai berlât viers di te dute la zornade:  
tu tu sêts bon, Signôr, e tu perdonis,  
tu sêts cjamât di boncûr cun ducj chei che ti clamin.

### Colete

Diu di ogni perfezion, ch'al è to dut ce che di miôr al è tal mont,  
semene tai nestris cûrs l'amôr pal to non,  
nudrîs in nô, cul cressi de fede, dutis lis robis buinis  
e, cul nestri impegn, vuarde ce che tu âs nudrît.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Sir 3,17-18.20.28-29

**Tu** âs di sbassâti, cussì tu cjatarâs gracie denant dal Signôr.  
Dal libri dal Fi di Sirac  
Fi, fâs lis tôs voris cun modestie,  
parcè che ti volaran plui ben a ti  
che no a di chel ch'al fâs regâi.  
Plui grant tu sêts e plui tu âs di sbassâti,  
cussì tu cjatarâs gracie denant dal Signôr.  
Lui al cjape glorie dai piçui.  
Il cûr dal savi al pense su lis parabulis,  
une orele atente, chê e je la sô brame.  
L'aghe e distude il fûc ch'al art,  
cussì la caritât e pare jù i pecjâts.  
Peraule di Diu.

### SALM RESPONSORIÂL dal Salm 67

**R.** Tu sêts tu, Signôr, il Pari dai umii.

I juscj s'indalegrin  
e a son contents denant di Diu,  
e a dan sù cjantis di gjonde. **R.**

Cjantait a Diu, fasêt al so non une cjante;  
«Signôr» al è il non che lui al puarte:  
gjoldêt a la sô presince. **R.**

Pari dai vuarfins e vuardean des veduis,  
chest al è Diu te sô sante cjase.  
Diu al torne a menâ a cjase chei che si jerin pierdûts  
e al mene i presonîrs te bondance. **R.**

Tu ur âs dade ploe, Diu, fin che ant vevin avonde;  
tu i âs tornât a dâ spirt a la tô ereditât sfinide.  
Il to trop alì si jere sistemât,  
e tu, Diu, cu la tô robe il biât tu sostentis. **R.**

### SECONDE LETURE Eb 12,18-19.22-24

**Vualtris si sêts svicinâts a la mont di Sion e a la citât dal Diu vîf.**

De letare ai Ebreos

Fradis, vualtris, no si sêts svicinâts a robis che si tocjin ni a un fûc ch' al pare in cinise ni al scûr, a la fumate e al burlaç, ni al sunôr de trombe o a sunsûr di peraulis, biel che chei che lu scoltavin a sconzuravin che Diu no ur fevelâs plui.

Vualtris si sêts svicinâts a la mont di Sion e a la citât dal Diu vîf, a la Gjerusalem dal cîl e a miârs di agnui, a la cunvigne de fieste e a la semblee dai prins fîs segnâts tai cîi, al Diu judiç di ducj e ai spirts dai juscj rifiñits fint insomp, al Mediatôr dal Gnûf Pat.

Peraule di Diu.

### **CJANT AL VANZELI Lc 4,18**

**R.** Aleluia, aleluia.

Il Signôr mi à mandât

a puartâur la buine gnove ai puars,  
a contâur ai presonîrs ch'a son libars.

**R.** Aleluia.

### **VANZELI Lc 14,1.7-14**

**Chel che si alce al vignarà sbassât, e chel che invezit si sbasse al vignarà alçât.**

Dal vanzeli seont Luche

Une dì Gjesù al jere jentrât in cjase di un dai sorestant dai fariseos par mangjâ un toc di pan e lu tignivin di voli.

Viodint che un pôcs di invidâts a sielzevin i prins puest, Gjesù ur contà une parabule: «Cuant che un ti invide a gnocis, no sta metiti tal prin puest, parcè che al podarès jessi invidât un plui impuantant di te; in chest câs, chel che ti à invidât al scugnarà vignâ dîti: Lassii il puest a lui. Alore tu, malapaiât, tu scugnarâs cjapâ l'ultin puest. Invezit, cuant che ti invidin a gnocis, va a metiti tal ultin puest. Cuant che al rivarà chel che ti à invidât, ti disarà: Amì, ven, cjapiti un puest miôr. Alore tu podarâs tignîti in bon denant di ducj i gnoçârs. Di fat chel che si alce al vignarà sbassât, e chel che invezit si sbasse al vignarà alçât».

Po i disè a di chel che lu veve invidât: «Cuant che tu ufrissis un gustâ o une cene, no tu âs di invidâ i tiei amîs e fradis, ni i tiei parincj, ni i siôrs ch'a son a stâ dongje di te; di fat chei li a puedin tornâ a invidâti e cussì ti ven tornât il plasê. Invezit, cuant che tu ufrissis un gustâ, tu âs di invidâ puars, strupiâts, çuets e vuarps; e tu sarâs furtunât parcè che lôr no an la pussibilitât di tornâti il plasê. Di fat ti vignarà tornât te resurezion dai juscj».

Peraule dal Signôr.

### **Su lis ufiertis**

Cheste sante ufierte nus siguri simpri, Signôr,  
la tô benedizion e la tô salvece  
e cu la sô fuarce e colmi ce ch'e opere intal misteri.  
Par Crist nestri Signôr.

### **Antifone a la comunion Sal 30,20**

Cetant grant ch'al è, Signôr, il to boncûr!  
Tu lu tegnis di bande par chei che ti temin.

### **Daspò de comunion**

Nudrîts cul pan dal cîl, ti preìn, Signôr,  
che chest sostentament dal to bonvolê al rinfuartissi i nestris cûrs  
e nus sburti a servîti intai nestris fradis.  
Par Crist nestri Signôr.

